

信徵全集



信微全集



信徵贅集

同治七年
著於碣石

序

圓子謂息子曰子盍建勲業以成名乎子盍修立功以永壽乎息子曰吾將以善及人者爲名吾將以文垂世者爲壽圓子曰位尊權重而後善乃及人推挽掄揚而後文乃垂世今子甘心冷落僻處海濱人邀特達子習退避人爭要地子湮偏隅非善世壽身之術也息子曰平居可以爲善何必顯宦躬行節儉志在勸懲纂輯先正格言刊刻廣布卽見道明一時學補後世功業之不朽何多讓焉貧賤儘可積福何必富貴存平等心行方便事效法前人懿德寡過遷善自然誼敦宗族薰及鄉隣利濟之無窮何以加焉圓子曰如是則宜林泉矣何事吏隱乎吏而隱是方枘以投仕仕之

贅疣也息子曰若然則將割贅疣以修我好乎贅疣則生割贅疣則死夫贅疣不猶愈於死乎彼妓者天性也里婦慕西子而效顰致醜聲遍國中今不幸而贅疣較里婦加醜矣吾將扱衽饋節勿得罪於田舍翁勿甯倚市門而張醜聲也圓子大笑曰惟此則人皆醜之矣國色罕矣子盍學魯仲連乎息子曰子欲我蹈東海而死乎有詩云昔者魯仲連談笑却秦卒千金薄沙泥揮去不受爵所以千載下士氣爲之作況乃握兵符視人如藜藿戰馬食黍禾金玉滿囊橐雖然意氣得禍至亦誰脫功成萬骨枯甯可甘退縮梁伯鸞五噫詩云陟彼北邙兮噫顧覽四海兮噫官爵崔嵬兮噫人之劬勞兮噫遼之未央兮噫圓子曰子真贅疣矣乃又作贅集

同治七年歲在戊辰秋七月同學愚弟李培謙益山撰

信徵贅集卷上

目錄

全文十六集三十二卷
計目共六百二十首

滇南段永源錦谷著

冷面先生

無舌童子

睡佛

童仙

聾婆

夔童

縮劫洞

寶源洞

石姑

甕丈

菜傭

木客

哭尾蟒

爬沙魚

蛋戶

狎家

伴松

雅鬼

冷面先生

天下山川之奇至武夷造其極亦如人中聖人盡美矣又盡善矣無以復加矣想天地在童幼之時好作嬉戲故命五丁六甲範土埏泥胚胎萬狀而以日月爲火陰陽爲炭圓玄爲爐煨煉陶融乃成此無可摹擬無可名言之巖岫也不然何詭恠之至是乎余在建甯時至古董店看舊書舊畫其店主王姓三父子皆已進學余問何不課讀則惟教學半曰此地教讀者多從學者少故硯田多荒勉強得館每年束修不過十餘千錢轉不如小販可以養家也因往來日久見其人俱謙和有禮又見其貨無多物乃贈錢二十千以作店本王感謝具菜招飲於其家初陳一碗是烟熏老鼠謂

本地以此爲敬客之至平時不輕設也東坡云蜜唧信亦有之飲
酒閒敘言其先父在武夷山景賢祠讀書房屋幽雅如在畫圖中
惟其內蚊蠅甚多擾擾不堪其苦余曰曾作蚊蠅一詩似與此切
蚊也忽啼蠅忽歌渺茲小輩費張羅避來掩面羞揮扇逐去使人
怒執戈每到黃昏聲漸大惟於熱鬧聚偏多垂帷閉戶猶然至擾
亂清閒奈爾何王曰君非爲蚊蠅也一日先子晝卧忽來士子年
五十餘歲體瘦而長鬚飄飄至腹入書室坐案前呼曰何犯宰予
之戒也先子急啟身欵接云因中宵苦於蚊未得寐是以晝寢幸
先生雅教敢不敬領其蚊蠅日中亦多言時紛紛觸臉客云爲君
驅之則見其張口噓氣五六月間遂覺涼颼颼竟有凜冽之意

移時蚊蠅盡淨矣因問先生別有四時乎何其胸藏奇氣也曰譬如搖扇得風彼未搖時非風之氣彼已搖時卽名爲風如鑽木得火彼未鑽時非火之形彼已鑽時卽名爲火又如水中之影有去有來所謂水者實無去來故衣搖空而得風氣呵物而得水水注水卽鳴石擊石卽光知此說者風雨露雷皆可爲之蓋風雨露雷本由氣生而氣由心生故內想大火久之卽熱內想層氷久之卽寒知此天地之德皆可同之曰此奇術可學而得乎曰夫偉人巨量逸韻高蹈獨往蕭然自得身寄流波之間神遊九霄之表道足於內物遺於外冠摧履決藍縷帶索何肯與俗人競春蜩夏蟬之鳴聒乎非漢濱之老人不能得明珠於泥蚌非泣血之卞氏不能

識夜光於重崖螭蜃屯蚊睫之中而笑彌天下之大鵬寸鮒遊牛
蹄之水不讓橫海之巨鱗道德不足以相涉聰明不足以相通理
自不合豈有奇耶然則先生自何來曰此間曲折吾遊踪已遍子
孫世代居之亦不知幾厯年所矣問先生何稱他日當虔謁得拜
於龐公榻下爲幸曰吾冷面先生也人生氣味相投又何處不相
逢耶乃取案上筆硯題於壁云頻年栖迹雲林下舉頭見山如見
畫如今置身圖畫間開眼見畫亦見山山耶畫耶孰得識具眼之
人世間寡景當好處卽構屋趣多佳時來道者居山不見山中佳
厭飫林壑輕烟霞一朝別山出城市黑風黃日昏塵沙廣庭曲巷
通幽處壘石栽花誇盛具眼中彷彿雖若真畢竟人爲少天趣回

思舊廬在山間欲一見之千萬難君住此間亦清福九曲溪山數
間屋遠山淡淡橫翠眉近山亭亭削青玉山腰處處橫白雲樹頭
樹尾晴輪囷平林忽斷天光露暝色遙連雨氣昏蒼苔白石羊腸
路平麓盤盤幾家住就中道人華陽巾手執靈芝摘青霧山光水
色相渺綿天末幽室生雲烟興來却憶孤鶴老住世何如住山好
人生卽景須盡歡尋仙何必蓬萊島寫竟擲筆飄然而去欲追從
之則見在萬丈懸崖之上不知從何而升也悵望久之雲踪旣滅
乃返自此室中晝夜永無蚊蠅之擾視牆上字筆之勢如騰蛇遊
霧飛龍乘雲天矯之姿稜稜欲動後以訪於多學之人乃知冷面
先生是茶之神也

無舌童子

顏氏安陋以成名原思娛道於至貧榮期以三樂感至人黔婁定
謚於布衾干木偃息以存魏荆萊志邁於江岑君平因筮以著道
四皓潛德於洛濱鄭真躬耕以致譽幼安發揚乎漢人皆持難奪
之節執不回之意有獨定之識不假謀於衆人守不動之安不惜
慮於羣賢居無事之宅處不爭之域損之不得測之愈深未聞齟
齬之子殘疾之人乃能刻苦自立爲世師範如無舌童子者也戴
潤生河南光州人在宜章營王叅府就教讀館時余在郴州常相
往來告余云族中有幼兒生無小舌長不能言父母早棄世童八
九歲時其親房叔伯欺其啞子欲佔霸房屋田產乃以糖食誘童

引至百里外棄荒野間而回童不能言從何問路餓則指口呵呵
以求食夜則宿人簷下漸乞漸遠去家已數百里矣一夜卧民家
草屋門前忽有虎來啣童而去至天明到大山中巉巖亂石箐陰
深萬丈樹森森無日色置童懸崖上意欲吞噬乃有羣鵲啁啁鳴
於空虎聞鵲聲似若甚懼拋童竄入密林大壑間童若睡醒不知
所向隨徑曲折視高處而行得一石穴大如屋頗乾燥乃扯草鋪
作茵夜宿其地穴外有草根如薑形食之不辣味甘而滑餓則撿
以充飢渴則掬澗泉飲之如是者半年覺身體輕健力氣充足橫
縱可數丈直聳能百尺履崎嶇如平坦陟峰巒如生羽翼遂遨遊
於遠近偶見峭壁下倚石構屋茆庵三間向東至則門閉未開亦